



REBOLUSYONARYO A DYARYO TI UMILI ITI AMIANAN-LAUD A LUZON

DANGADANG

ENERO 7, 2005



TAWEN 19 BLG. 1



IPÁSA NO MABÁSA

LINAON

Pablaak
ti KT-KR

1

PANNIRIGAN

9

Ad-adda pay nga agurnong iti rebolusyonaryo a pigsa, palawaen ti panagkaykaysa ti umili ken pairtengen ti pannakidangadang para iti panangrippuog iti Rehimen nga US-Arroyo

RAMBAKAN TAYO DAYTOY nga aldaw ti maika-36 anibersaryo ti pannakaibangon manen ti Partido Komunista ti Pilipinas – ti naindaklan ken nari-mat a Partido ti dasig a mangmangged a Pilipino a tartarabayen ti kaabantean a teorya a Marxismo-Leninismo-Maoismo. Ti Partido tayo ket napnuan iti dedikasyon – iti panagserbi iti umili, iti panangpunas iti panang-gundaway ken panangidadanes, ken iti panangbalbaliw iti bulok a gimong agturong iti maysa a pudno a nainkalintegan, makatao, ken nasaliwanwan a gimong iti lubong. Manipud idi naibangon manen ti Partido, 36 tawenen ti napalabas agingga ita, daytoy ket napudno ken awanan ban-nog a nangidaulo ken nangtarabay iti umili a Pilipino, a ginasut a tawenen nga idaddadanes ken gunggundawa-yan ti imperyalismo, pyudalismo, ken bu-rukrata kapitalismo, agturong iti dana ti baro demokratiko a rebolusyon nga ad-da-an sosyalista a perspektiba.

Pablaak ti Komiteng Tagapagpaganap
- Komite iti Rehiyon (KT-KR) ti Ilocos-
Cordillera ti Partido Komunista ti Pilipinas
iti maika-36 Anibersaryo ti Partido





Manen, itay napalabas a tawen, naranyag ken nabunga ti panangidaulo ti Partido tayo ken maibaga tayo a ti Partido tayo ket ad-adda a dimmakkel ken natibtibker iti ideolohiya, politika ken organisasyon. Daytoy ket nauneg a nakaramút ken agsagsagrap iti awan sarday a suporta ti nalawa a masa iti kaaw-awayan ken syudad. Napapateg a balligi ti nagun-od ti Partido tayo iti tay-ak ti panangbukel iti Partido, armado a pannakidangadang, rebolusyonaryo a tignayan a masa iti naparang ken nalimed, nagkaykaysa a prente, ken proletaryo nga internasyonalismo. Dagitoy ket nayon a puonan iti panagtultuloy ti panagrebolusyon tayo iti iseserrek na iti maika-37 a tawen ken kadagiti umay pay a tawen agingga iti naan-anáy a balligi ti nailian demokratiko ken sosyalista a rebolusyon.

Ti dara ken biag ti rinibribu a martir ken bannuar ti rebolusyon tayo ket isu ti mangsibsibug, mangpatpatibker, ken mangmangted biag iti Partido tayo. Iti okasyon ti panangselebrar tayo ti maika-36 anibersaryo ti Partido, rumbeng nga ipaayan tayo ida ti panangsaludo ken kangatuan a pammadayaw.



REBOLUSYONARYO A DYARYO TI UMILI ITI AMIANAN-LAUD A LUZON

DANGADANG

Ti **DANGADANG** ket rebolusyonaryo a dyaryo ti umili iti Amianan-Laud a Luzon. Kas dyaryo ti umili, ditoy a maipablaak dagiti kinapudno a laplappedan ken kalkaluban dagiti agturturay a dasig. Ditoy a maammuan tayo dagiti damag ken impormasyon a saan a rumrummuar kadagiti dyaryo, radyo, ken pagiwarnak a kontrol dagiti managgundaway ken manangidadanes a dasig.

Ti **DANGADANG** ket rummuar dua a daras kada bulan iti tarabay ti Partido Komunista ti Pilipinas. Tapno naan-anay nga agserbi daytoy kas boses ti umili, dawaten mi nga ipatulod yo dagiti damdamag, komentaryo, kanta, iskit, daniw, drowing, ken dadduma pay a kayat yo a maipablaak. Kasta met a silulukat kami iti aniaman a dillaw, obserbasyon, ken singasing.

Pagtitinnulongan tayo a padur-asen ti **DANGADANG**. Ti lima a piso a presyo ti dyaryo tayo ket bassit a boluntaryo a donasyon tapno masuportaan ti agtultuloy a panagruar na.

“...lallalo pay a pimmigsa ken

immabante tayo bayat a makomkompleto

ti umuna a paset ti estratehiko a dependensiba

ken napardas nga umad-addang agturong

iti tengnga a paset ti estratehiko

a dependensiba ti gubat ti umili tayo.”

**Naririmat a rebolusyonaryo
a balligi iti tengnga ti nailian
ken sangalubongan a krisis**

Itay napalabas a tawen, naan-anáy nga inyabante ti intero a kameng ti Partido, NPA, ken rebolusyonaryo a tignayan dagiti rebbengen nga inkeddeng ti maika-11 Plenum ti Komite Sentral. Napardas a dinanon tayo dagiti alimpatok ti panagabante a nadanon tayo iti nadumaduma a linya ti trabaho idi maudi a paset ti dekada '80, bayat a nalabsanen ti sumagmamano. Iti agdama, lallalo pay a pimmigsa ken immabante tayo bayat a makomkompleto ti umuna a paset ti estratehiko a dependensiba ken napardas nga umad-addang agturong iti tengnga a paset ti estratehiko a dependensiba ti gubat ti umili tayo.

Iti kabuklan, ad-adda pay a limmawa dagiti larangan a gerilya tayo iti ad-adu a munisipalidad ken baryo uray pay adda dagiti nakissayan a sumagmamano a paset ti dadduma a rehiyon bunga dagiti nakaro a panagraut ken operasyon militar ti kabusor.

Iti intar ti mano a milyon a base a masa, tumatauden dagiti tukad-munisipalidad a rebolusyonaryo a timpuyog ti mannalon ken dagiti tukad-munisipalidad ken inter-munisipalidad a koordinado a panagtignay ken pannakidangadang. Agtultuloy a maiplasplastar ti ad-adu nga Organo ti Bileg Politikal ken nadumaduma a tukad dagiti rebolusyonaryo nga organisasyon masa ti mannalon, kababaihan, kabataan, ken ubbing iti ad-adu a baryo ken komunidad.



Iti laksid dagiti tuloy-tuloy a kinaranggas militar, ad-adda a naregta ken militante ti base a masa iti kabuklan, gapu kadagiti nadumaduma a baro a tipo ti benepisyo a magunggun-od da manipud kadagiti nasaysayaat ken nabungbunga a kampanya a kontra-pyudal, sabali pay dagiti sagsagrapen da a balligi iti pannakidangadang a pang-ekonomya ken politikal.

Iti bangir ti nadumaduma a problema ken limitasyon, nagtultuloy ti panagdakkel ken konsolidasyon ti NPA ken nasagedsed nga ipatpatungpal na dagiti rekisito para iti sostenido a panagabante ti armado a panna-kidangadang ken panangbukel iti base. Ti platun kas batayan a pormasyon ken ti panangbukel kadagiti kadakkel-kompanya a larangan a gerilya kas napapateg



a pagangklaan ti panangiyabante iti nasaknap ken nasagedsed a pannakigubat a gerilya ket nasayaat a maisansanay ken magunggun-oden. Ti kombinasyon a panangpaandar iti SDG-Platun ken SYP-Platun ket maysa a napateg a ramen ti natibker a panagabante. Ti NPA ket simmabak iti nakaad-adu a naimballigian a taktikal nga opensiba a naglatakan dagiti operasyon nga awan putok, espesyal nga operasyon a partisano iti urban ken sentro ti munisipalidad, ken panagsamsam iti adu nga armas ken dadduma pay a ramit militar tapno masungbatan ti dumakdakkel a kasapulan ti Hukbo tayo. Dumakdakkel met ti bilang dagiti yunit ti milisyang bayan ken marugrugianen ti panangibangon iti dadduma pay a puerisa a katinulong (*auxillary*) a kas iti *self-defense units* (sabali iti *self-defense corp* dagiti ROM).

Iti laksid ti tuloy-tuloy a pananglipit ti pasista a rehimen nga Arroyo, limmawa ken dimmakel ti rebolusyonaryo a tignayan a masa kadagiti syudad (karaman dagiti sentro ti munisipalidad). Indauluan ken nasustine tayo ti adu a dadakkel a politikal a panna-kidangadang (ken dagiti sektoral a pannakidangadang a masa) iti nadumaduma

a paset ti arkipelago. Manon a daras a nabaelan ti aggigiddan a politikal a mobilisasyon kadagiti kangrunaan a syudad iti nadumaduma a rehiyon ti pagilian. Tuloy-tuloy a naibutaktak ken linabanan ti rebolusyonaryo a tignayan masa iti syudad dagiti manangidadanes, managgundaway, kontra-nasyonal, ken kontra-umili a patakaran ken addang ti rehimen a GMA. Nangibunga daytoy iti signipikante a danog, panagsuwek ti popularidad, ken pannakaisina ti rehimen iti batayan a masa, naibutaktak ti napeklan

“ Dadakkel ti kontribusyon ti Partido tayo ken rebolusyonaryo a tignayan iti panangiyabante iti sangalubongan a tignayan a proletaryo ken iti kontra-imperyalista a pannakidangadang iti sangalubongan a saklaw. ”

a kinaaso-aso na iti imperyalismo nga US.

Iti napalabas nga eleksyon, naipakita ti kabaelan ti intero a rebolusyonaryo a tignayan a sumrek iti nairteng ken pukpokan a laban ken iti nadumaduma a tukad ken tipo ti nagkaykaysa a prente. Daytoy ket nangibunga iti dadakkel a balligi iti politikal ken materyal, ken iti taktikal ken pangmabayagan a konsiderasyon. Ti sumagmamano a milyon a simmuporta (malaksid iti dakkel a porsyento ti nasaur a botos) kadagiti pudno a progresibo a partylist ket sarming ti panagramut ken panagsaknap ti rebolusyonaryo a tignayan ken impluwensya, kasta met ti suporta a sagsagrapen ti tignayan.

Dimmakel ti Partido tayo ken nauneg a nakaramút iti nalawa a base a masa ti rebolusyon. Nalawa ken adu ti naitakder a Sangay ti Partido kadagiti lokalidad, Komite a Seksyon a nakabase iti hukbo ken teritoryo iti puraw a purok, Komite a Larangan wenno Distrito kadagiti larangan a gerilya. Agtultuloy a panagdakkel ti bilang dagiti kameng. Ti signipikante a bilang ti dumurdur-as a kadre a napanday iti ideolohiya, politika, ken organisasyon ket naikabil kadagiti napapateg a sentro ti liderato



kadagiti teritoryo ken organo ti *line work* iti nadumaduma a tukad ti organisasyon ti Partido. Umad-adu dagiti baro ken ub-ubing a puersa ken kadre a napardas a masansanay nga agipatungpal iti dadakkel ken nadadagsen a trabaho – napateg a panagdur-as daytoy gapu ta bumakbaknang ti bubon para iti tuloy-tuloy a panangidaulo ti Partido iti maiyab-abante a naunday a gubat ti umili ken iti sumaruno a tukad ti sosyalista a rebolusyon ken konstruksyon.

Narugianen a maiyabante ti Abante a Kurso ti Partido (AKP) iti nasyonal a tukad ken tuloy-tuloy a maiyab-abante ti Intermedya ken Batayan a Kurso ti Partido para iti tuloy-tuloy ken addang-addang a panangingato iti teoretikal a tukad ti intero a kameng ken grupo dagiti kadre ti Partido manipud iti batayan agingga iti nasyonal a tukad.

Dadakkel ti kontribusyon ti Partido tayo ken rebolusyonaryo a tignayan iti panangiyabante iti sangalu-bongan a tignayan a proletaryo ken iti kontra-imperyalista a pannakidangadang iti sangalu-bongan a saklaw. Iti sabali a bangir, agsagsagrap ti Partido ken rebolusyon tayo ti nangato a pannakabigbig ken su-porta manipud kadagiti kabsat a Partido a Marxista, Leninista, Maoista, ken iti dadduma pay nga organisasyon nga MLM ken kontra-imperyalista. Dagiti balligi tayo ket nagunod iti tengnga ti kumarkaro a krisis iti pagilian ken iti sangalubongan.

Napalalo unay ti sitwasyon ti mala-kolonyal ken mala-pyudal a pagilian tayo. Ti reaksyonaryo ken pasista a rehimen nga Arroyo ket nailumlom iti agrurutap a krisis iti ekonomya ken politika a mangidurduron iti napardas a pannakabulok ti agturturay a sistema ken panagirteng dagiti laban. Ti *fiscal crisis* (krisis iti badyet) ken ti agburburek a krisis iti pinansya ket napardas a mangguyguyod iti


kombulsyon ti kabuklan nga ekonomya ti pagilian a nabayagen nga agbugbugsot ken agpeggad iti interamente a panagbagsak tunggal mapasamak ti uray bassit a siklo ti krisis ti sangalubongan a sistema a kapitalista a nakaigalutan na.

Ti neoliberalismo ken imperyalista a “globalisasyon” ket sipipinget nga itantandudo ti rehimen nga Arroyo. Daytoy ti mangal-alun-on ita iti umili a Pilipino, mangdaddadael iti ekonomya ti pagilian, mangdaddadael kadagiti produktibo a puersa (dagiti mangmanged ken mannalon), ken mangi-durduron iti dumakdakkel a paset ti populasyon iti interamente a kinamirmiraut (60% ti populasyon ket agbibig iti nababbaba ngem P50 tunggal aldaw). Awan kapada

iti napalabas ti umad-adu a bilang ita ti awanan taraon, awanan panggedan, pumanaw ken agbirok ti pagbiagan iti ruar ti pagilian – a pakaragsakan ti rehimen nga Arroyo nga ipaadipen kadagiti gamrud a kapitalista a ganggannaet, ken mangirubo iti umili iti kinaulpit ken panangibabain dagiti amo a ganggannaet.

Agbugbugsot nga eko-nomya a pagpappapasan iti manon a dekada dagiti imperyalista, da-dakkel a komprador burgesya, apo’t daga, ken dadakkel nga agtatakaw a burukrata kapitalista. Makita daytoy iti lumoblobo a *budget deficit* (nasurok P200 bilyon idi 2004), dakkel a pannakalugi iti binnayad (dumanon iti P600 bilyon idi 2004), panaglobo ti eksternal nga utang ti pagilian (\$56.3 bilyon idi June 2004, dumanon iti \$60B idi gibis ti 2004). Amin dagitoy ket naulpit nga ipabpabaklay ken ipabpabayad da itatta kadagiti agpalpalimos a mangmanged, mannalon, mala-mangmanged, nakurapay iti syudad, ken dadduma nga umili a bumagbagsak ti pastrek da kas kadagiti titser, empleyado, ken dadduma pay nga ordinaryo a masa nga awanan panggedan ken awanan iti pangep-ep iti bisin. Daytoy






**“ Imbes a resolbaen ti rehimen
nga US-Arroyo ti krisis ket lalo pay
a pakpakaruen na daytoy. ”**

ket babaen iti panangipabaklay iti masa ti baro a nadadagsen a buwis a nayon kadagiti napalabas a buwis kas kadagiti sumaganad: P2 *across-the-board* a panagngato ti partikular a buwis iti produkto a langis; dua a daras a panagngato ti VAT (*value added tax*) manipud 10% agturong iti 12-20%; nayon a buwis iti sigarilyo ken arak; panagngato dagiti babayadan (kas iti *professional fees*, sedula, lisensya, registration, kdp); “*lateral attrition*” wenno panangikkat kadagiti 30% (420,000) empleyado ti gobyerno, buwis iti telekomunikasyon (*texting, long distance*), panagbuwis basar iti kabuklan ken saan nga iti neto a pastrek, ken panangited iti *tax amnesty* kadagiti dadakkel a korporasyon.

Kabayatan nga awan ti signipikante a benepisyo ti umili a Pilipino manipud kadagitoy a buwis. Bimmagsak ti kalidad ti serbisyo publiko, edukasyon, salun-at, seguridad ti kinatao ken biag, ken agpeggad ti umili iti daddadakkel a krimen iti gimong. Dandani awan ti pondo ken pasilidad ti gobyerno tapno maarayat ti ginasut a ribu a madiddidigra kadagiti makapatay a kalamidad a parpartuaten wenno pakpakaruen ti gobyerno, agturturay a dasig, ken kalikasan. Daytoy ket gapu iti pannakakissay ti pondo ken nailatang kadagitoy, tapno mainayon iti pagbayad iti utang



kadagiti imperyalista a bangko (iti kaudian, 81% ti kabuklan a pastrek ti gobyerno ket mapmapan iti bayad iti utang), pangbussog iti mersenaryo nga AFP ken PNP, ken pangmentina ti nabarayuboy a panagbiag dagiti dadakkel nga opisyal ti gobyerno (karamanen ti senado ken konggreso) ken militar.

Awan ti nasayaat ken pang-mabayagan a pang-ekonomya a pro-grama ti rehimen nga Arroyo. Ultimo babassit nga industriya a manupaktura dagiti nailian a burgesya (Marikina shoes, Sarao Motors, pabrika ti bagoong, kandila, pabrika ti pansit, pabrika ti toothpick, kdp.) ket produkto a saan a magatang gapu iti panaglayus dagiti nalaka a produkto a ganggannaet (*low-value added* ken uray pay dagiti produkto nga agrikultural) a nalisensyaan a libre a sumrek iti pagilian iti nagan ti “*trade liberalization*”. Agtultuloy nga awan ti batayan nga industriyalisasyon nga isu ti namnamaen a pudno a mangitag-ay iti ekonomya ken progreso ti pagbiagan ti umili. Ken pati ti agrikultural a produksyon ti pagilian ket in-inut a patpatayen ti dadakkel nga importasyon ti bagas, nateng, tabako, prutas, ikan, karne, kdp.

Lallalo nga immuneg ti krisis ti agrikultural, pre-industriyal, ken malapyudal a pagilian a Pilipinas. Imbes a resolbaen ti rehimen nga US-Arroyo ti krisis ket lalo pay a pakpakaruen na daytoy.

Ti agburburek a krisis iti politika
sakbay ti eleksyon idi Mayo 2004 ket





ad-adda pay a kimmaro kalpasan na. Ti anomalya a pannakaideklara ti panangabak ni Arroyo kas pangulo ti Pilipinas ket isu ti basaran ti estratehiko a kinarukop ti rehimen na. Dadakkel ti bettak iti intar dagiti agturturay a dasig ken tuloy-tuloy ti panagpangta ken panagtignay ti nadumaduma a paksyon ti burges nga oposisyon tapno pabagsaken ti rehimen nga Arroyo babaen iti kudeta. Ti innagaw iti posisyon ken bileg, kinabaknang, ken ti tuloy-tuloy a dakkel a korapsyon iti amin a sangay ti burukrasya a sibilyan ken militar aglalo iti AFP ti ad-adda a mangbulbulok ken mangpakpakapsut iti burges ken mala-kolonyal a sistema a politikal ti pagilian. Napardas a nagsuwek ti talek, dimmakkel ti disgusto ti umili, ken nakaro ti pannakaisina ti rehimen nga Arroyo iti umili.

Dagiti dati a personalidad ken puersa ti bunggoy a Marcos ken Erap nga adda iti oposisyon ti reaksyonaryo a gobyerno ket agkalikagum a makasubli iti tuktok ti turay iti Malakanyang gapu iti pagarup da a mangabak ni FPJ kas presidente. Ti pannakapaay da nga idalan iti labanan nga elektoral ket mangidurduron kadakuada itatta nga idalan iti kudeta babaen iti panangusar iti nasaknap a disgusto ti umili. Ti sektor ti dadakkel a negosyo ken liderato ti Simbaan ket agtultuloy pay iti panagsuporta ken makisalsala iti agsumbangir a paksyon ti agturturay a dasig ken agdudua a sumuporta kadagiti lehitimo ken nainkalintegan a dangadang, interes, ken panawagan dagiti batayan a masa para iti panagbalaliw.

Nakarkaro ngem iti napalabas, nasaknap ti pannakariribuk ti umili. Isuda ti nakaro a tamtamaan ti nakaro a krisis iti pagbiagan ken politikal a pananglipit. Naranggas a maliplipit dagiti lehitimo ken nainkalintegan a pannakidangadang dagiti mangmangged, mannalon, empleyado, estudyante, ken dadduma pay a demokratiko a sektor iti kaaw-awayan ken syudad. Nairteng ti militarisasyon iti kaaw-awayan. Adu a baryo ken munisipalidad ti maipapauneg iti militarisasyon ken kampanya nga henosidyo, panangpapanaw, ken panangkontrol iti populasyon.

Paborable unay ti kasasaad iti pagilian tapno



ad-adda pay nga iyabante ken gun-oden tayo dagiti dakdakkel a balligi ti rebolusyon. Lallalo daytoy a palpalataken ti umir-irteng a kabuklan a krisis ti kapitalismo a tumamtama kadagiti sentro ti kapitalismo iti US, Japan, ken Europe. Nairteng ti kontradiksiyon iti baet dagiti umili iti lubong ken dagiti pagilian a maidadanes laban iti imperyalismo, iti baet ti sangalubongan a burgesya ken sangalubongan a proletaryo, ken iti baet dagiti nabileg nga imperyalista a pagilian ken dagiti nakapsut a kapitalista a pagilian. Ti kampanya a “kontra-terorismo” ti US ken dagiti kaalyado na ket sabsabaten ti napigsa a panagsupiat ken panaglabaan dagiti umili iti lubong, uray dagiti umili iti mismo a sentro ti US, a kumontra iti gubat ken agayat iti kappia. Umad-adu a pagilian iti Asia, Africa, ken Latin America ti bumagbagsak ti ekonomya na gapu ta daddadaelen ti imperyalismo. Dagiti saan nga tumungpal iti pampolitika ken pang-ekonomya a diktar ket naranggas a rarauten ti imperyalismo nga US. Kabayatan na, napardas a dumandanog nga agsubli ti krisis ti kapitalismo kadagiti mismo tallo a sentro ti kapitalismo ken mangpatpataud iti internal a riribuk. In-inut a rarauten na ti bukod na nga umili aglalo ti dasig a mangmangged.

Nasaknap a bumangbangon ken lumablabaan dagiti umili ti lubong laban iti imperyalismo, rasismo, zionismo, ken kadagiti panggep dagiti sangalubongan a ramay-ramay ti imperyalismo kas iti IMF, WB, ken WTO. Lumawlawta ti panagkay-kaysa dagiti Marxista-Leninista-Maoista a Partido,



organisasyon, ken tignayan. Kasta met, umad-adu dagiti pagilian a mangiyab-abante ken agsagsagana nga agisayangkat iti gubat ti umili; ken lumawlaw ti sangalubongan a panagkaykaysa a tumiptiponan dagiti maidadanes a pagilian, nadumaduma a progresibo nga organisasyon masa, institusyon, ken dagiti nasyonal ken internasyonal a progresibo a personalidad laban iti imperyalismo. Nalatak ti pannakaibangon ti International League of People's Struggle (ILPS) idi 2002 ken maikadua a komperensya na itay Nobyembre 2004.

Iti tayo rehiyon nga Ilocos-Cordillera iti naglabas a tawen, dimmakel ti bilang dagiti miembro ti Partido ken hukbo, bilang dagiti larangan, ken uray ti bilang dagiti napipigsa a riple. Iti sakup a pagtigtignayan, dimmakel met ti bilang dagiti baryo, organizado a masa, ken ti kabuklan a base a masa iti bangir ti panagkissay iti sumagmamano a larangan a nakonsentraan ti panagraut dagiti RSOT ti kabusor. Numan pay adda ti sumagmamano a naimballigian a taktikal nga opensiba, bimmaba ti regta na iti dandani amin a larangan. Ngarud, daytoy ti maysa a masapul a pokusan dagiti liderato ti Partido kadagiti probinsya ken larangan. Naregta ti panagiyabante iti agraryo a rebolusyon aglalo ti tignayan a kontra-pyudal iti Ilocos. Masapul met nga igiddan daytoy iti naparang a tignayan a mannalon aglalo iti panaglaban kadagiti linteg ken importasyon a mangpatpatay iti agrikultura.

Immabante ti trabaho nga alyansa iti kaawayan iti tukad probinsya inggana tukad baryo ngem masapul a sanguen daytoy a tuloy-tuloy. Adu ti rinisut tayo a batayan nga usapin iti inaldaw-aldaw


a panangiyabante iti trabaho nga armado a pannakidangadang, panagbukel ti base, ken panangiyabante ti rebolusyonaryo a agraryo.

Nagbunga dagito kadagiti napapateg a balligi iti rebolusyonaryo a tignayan ken benepisyo a partikular ken pangmabayagan para iti masa. Ngem masapul a takuatan tayo pay ti nadumaduma wagas nga umannatup kadagiti lokal a kasasaad ken tapno mapaay dagiti panggep ti kabusor.

Nasustine dagiti sektoral ken multi-sektoral a tignayan a masa iti urban ken sentrong bayan iti bangir ti nakaro a panagranggas ken pammutbuteng dagiti puersa militar ken polis aglalo iti Ilocos. Naiyabante ti nadumaduma nga isyu iti nadumaduma a sektor ti masa iti rehiyon – sueldo, edukasyon, pangtao a karbengan, panangngato ti presyo ti langis ken dagiti tagilako, kinaawan ti trabaho, kinakurang ti serbisyo, ken dadduma pay a kasilpo ti kontra-umili a patakaran a pribatisasyon, liberalisasyon, ken deregulasyon. Napalawa pay ti pannakidangadang a kontra-minas, aglalo iti awan sarday a dangadang a kontra-polusyon ken kontra-expansyon ti Lepanto. Manamnama nga umirteng pay daytoy a laban gapu iti awanan bain a panangaprobar (panangbaliktad iti desisyon) ti Korte Suprema iti panagbalin a ligal ti Mining Act of 1995, nga immuna nga indeklara na idi kas iligal. Kas panagsagana pay para iti dakdakkal a panag-addang, naiyabante ti kon-solidasyon dagiti puersa ti tignayan a mangmanged ken tignayan a kabataan-estudyante, kagiddan ti panagkonsolida kadagiti nagun-od iti trabaho nga alyansa kalpasan ti Eleksyon 2004.

Ti pannakaibutaktak ti bangkrap a programa ken panawagan dagiti puersa a Kontras, bogus a repormista, ken dagiti puersa a para-militar a kas ti CPLA ket paborable a kondisyon tapno nasurok pay a maiyabante ti rebolusyonaryo ken progresibo a panagtignay a mangsungbat iti pudno nga interes ti masa iti urban ken sentrong bayan.

Para iti rehiyon, napateg a detalyado a malagom dagiti kapadasan iti nadumaduma nga aspeto ti trabaho iti ideolohiya, politika, ken organisasyon; maadaw dagiti





nalatak nga adal a positibo ken negatibo; ken nairut a maiggeman dagiti tulbek nga addang iti panagabante.

Dagiti rebbengen iti panagabante

Iti iseserrek ti Partido tayo iti maika-37 tawen, kasapulan ti natibker, natadem, ken nakasilpo iti masa a panangidaulo, ad-adda pay a palawaen ken papigsaen dagiti rebolusyonaryo a pueras, ken iyabante ti gubat ti umili iti baro a tukad.

1 Gun-oden ti maysa a napigsa, agkaykaysa, ken nasirib a panangidaulo ti Partido iti amin a tukad. Iti intar ti abante a seksyon ti masa, padur-asen ti ad-adu a baro, nareregta, ken ub-ubing nga henerasyon dagiti kadre ken kameng ti Partido, komprehensibo a pandayen ida iti ideolohiya, politika, ken organisasyon, ken siguraduen ti nauneg a bubon ti panangidaulo ti Partido iti amin a tukad ken linya ti trabaho.

2 Padur-asen ti nasaknap a kinaregta ti masa (*mass enthusiasm*) ken determinasyon ti umili para iti pannakitipon iti gubat ti umili ken iti dadduma pay a porma ti pannakidangadang a ligal ken nalimed. Ti pangmasa nga enerhiya ket itransporma kas managparnuay a rebolusyonaryo nga inisyatiba para iti panangiyabante ti bukod a pagimbagan ti masa ken rebolusyon.

3 Pandayen ti kabaelan ti Partido, NPA, ken rebolusyonaryo a pueras a sumango kadagiti trabaho ken usapin iti nalawlaw a saklaw aglalo

iti tukad sub-seksyon, seksyon, munisipalidad, ken larangan.

4 Patauden dagiti Organo ti Bileg Politikal ken iyabante dagiti kampanya a kontra-pyudal ken dadduma pay a kampanya tapno mapadur-as ti pagbiagan ken pagsayaatan ti umili.

5 Agpursige iti panangpaandar iti platun kas batayan a pormasyon ti NPA ken gun-oden dagiti kadakkel-kompanya a larangan a gerilya para iti ad-adda a panangiyabante ti nasaknap ken nasagedsed a pannakigubat a gerilya.

6 Danonen ken padur-asen ti dakdakkel a bilang ti batayan a masa kadagiti syudad ken sentro ti munisipalidad ken pagayusen ti napigsa a tignayan a masa. Danonen ti nalawlaw nga intar ti akintengnga a pueras, ken pagkaykaysaen ti kaaduan bayat nga isina ti manmano a pueras a kontra-rebolusyonaryo ken reaksyonaryo.

7 Ad-adda pay nga iyabante ti nadumaduma a porma ti ligal ken iligal, armado ken di-armado a pannakidangadang ken patignayen ti amin a positibo a pueras tapno iduron ti naan-anáy a pannakaisina ken ti sumaruno a panangpabagsak iti rehimen nga US-Arroyo.

**IYABANTE TI DEMOKRATIKO A REBOLUSYON
TI UMILI AGINGGA ITI NAAN-ANÁY A BALLIGI!**

AGBIAG TI PARTIDO KOMUNISTA TI PILIPINAS!


AGBIAG TI UMILI A PILIPINO!

Panagbalbaliw iti DANGADANG

Manipud iti daytoy nga isyu ti *Dangadang*, rummuar daytoy dua a daras kada bulan, kagiddan ti panagruar ti *Ang Bayan* Iloko edisyon. Daytoy ket tapno naparpardas ti pannakaipablaak dagiti damag ken paspasamak ken naimpanawenan a matalakay dagiti nabara nga isyu ti umili iti rehiyon ti Ilocos ken Cordillera. Kasta met nga agkumpas ti *Dangadang* ken ti nasyonal a pagiwarnak.

Tapno agballigi a rummuar ti *Dangadang* mamindua kada bulan, kidkiddawen ti istap ti

Dangadang ti amin a masa, aktibista, kameng ti NPA, ken kadre ti Partido a regular nga agipatulod kadagiti kontribusyon iti porma ti damag, datos, artikulo, daniw, kanta, drowing, pidbak, kdpay.





Ka Simon "Filiw" Naogsan
Tagapagsarita CPDF

Rumaut dagiti imperyalista a minas no 2005

KASLA AGNGIRNGIRSI A demonyo ni Uncle Sam ken dagiti kadua na nga imperyalista. Ngamin sinagutan ti gobyerno ida ti nasapa a regalo idi paskua. Uray la a dumanon iti puon ti lapayag ti isem da!

Ngamin, idi Disyembre 1, 2004, pinasingkedan ti reaksyonaryo a Korte Suprema ti linteg a Philippine Mining Act of 1995. Gapu ditoy, nalukatan manen ti ruangan para iti nawaya a panagraut dagiti adu pay a ganggannaet a kompanya ti minas, saan laeng a ditoy Kordilyera no di ket iti dadduma pay a paset ti Pilipinas a nabaknang iti balitok, pirak, gambang, kdpay.

Sakbay daytoy, malagip tayo nga idi Enero 2004, inyetnag ti pareho a Korte Suprema nga adda dagiti paset ti Mining Act of 1995 a manglablalsing iti 1987 Konstitusyon ti Pilipinas. Partikular ditoy ti probisyon a mangiparit iti panagtagikua dagiti ganggannaet a kompanya iti minas iti nasursurok ngem 40% iti eksplorasyon, *development*, ken panagusar iti natural a kinabaknang ti pagilian. Gapu ditoy "naturog" dagiti aplikasyon dagiti imperyalista a korporasyon para iti panagminas. Ngem kabayatan na ket nagmaniobra dagiti imperyalista ken dagiti kakumplot da a komprador burges tapno mabaliktad ti desisyon. Inusar da ti US\$50 milyon a pondo dagiti imperyalista a kompanya a US, Britain ken Netherlands tapno pangpasuksok kadagiti kameng ti mahistrado ti Korte Suprema tapno baliktaden da ti desisyon da. Isu a kellaat a binaliktad ti Korte Suprema

daydiay a desisyon na. Arig na, inaprosan ken kinudkodan na ti bukot ti umili, kalpasan na ket binagsol na daytoy.

Makita ditoy no sinno ti pudno a pagserserbian ti Korte Suprema — dagiti kapada da ken kakumplot da nga agar-ari a dasig: apo't daga, komprador burgesya, ken imperyalista. Iti sistema ti reaksyonaryo a gobyerno, mabalin nga insigida a mabaliktad lattan dagiti bukod na a linteg ken desisyon tapno maipakat ti pagayatan da uray no nalawag a pagdaksan ti umili.

Naan-anay a naburak ti pammarang ti Korte Suprema nga isu kano ti maudi a pagtaklinan para iti pannakasalaknib ti natural a kinabaknang ti pagilian.

Insigida kalpasan ti desisyon ti Korte Suprema, alisto a naggaraw dagiti imperyalista a kompanya tapno pabaruen manen





KOMPANYA	APLIKASYON	LAWA (EKTARYA)	PROBINSYA
Newcrest	FTAA	33,685	Abra
Newmont Block VIII	FTAA	77,549	Benguet, Abra, Mountain Province, ken Ilocos Sur
Newmont	FTAA	100,000	Kalinga, Apayao, Ilocos Norte
Newmont Block X	FTAA	73,000	Abra
First Resources	FTAA	37,000	Abra ken Mountain Province
First Resources	EPA	15,880	Abra

wagas ti panagminas da gapu ta *open pit mining* ti mausar. Daytoy ket mangkalbo iti kabakiran, mangpatag iti bantay, ken magpukaw iti danum. Ti rugit nga ibelleng da ket mangsabidong iti daga, angin, ken karayan. Napaneknekan daytoyen iti atiddog a kapadasan ti umili iti 100 tawen a pangminas ti Benguet Corporation idia Itogon, Benguet, ken iti agtultuloy a panagminas ti Lepanto

dagiti “naturog” nga aplikasyon da a kas iti Financial and Technical Assistance Agreement (FTAA), Mineral Production Sharing Agreement (MPSA), ken Exploration Permit Agreement (EPA). Iti syudad ti Baguio naibangon manen dagiti opisina ti Newcrest-Australia, ken Newmont-USA.

Agarup 446,577 ektarya (apagkapat wenno 1/4 ti Kordilyera) ti total a sakup dagiti aplikasyon dagiti imperyalista iti panagminas. Addan 13,167 ektarya a naaprobaran. Nalabit nga ikamakam ti gobyerno nga aprobaran dagiti dadduma pay gapu ta desperado ni Arroyo a makapataud iti pondo para iti bangrap a gobyerno na.

Dakkel a didigra para ti umili ken aglawlaw iti rehiyon Kordilyera ken Ilocos. Saan a pudno ti propaganda da a panagdur-as iti umili ti ipaay dagiti dadakkel a minas.

Umuna, mapalubosan dagiti korporasyon a 100% a sanikua dagiti ganggannaet, nawaya da a mangiyawid iti intero a ganansya da, ken bassit laeng ti bayadan da a buwis. Dagiti mineral nga alaen da ket saan mausar para iti panagpadur-as ti komunidad, rehiyon ken intero a pagilian no di ket italaw ken bukodan dagiti imperyalista.

Maikadua, manmano laeng ti alaen da a minero gapu ta dadakkel a makina ti usaren da iti panagminas. Dagiti met maala a mangmangged ket sueldoan da iti nababa ken agtrabaho iti napeggad a kasasaad.

Maikatlo ket ti napalalo a makadadael a

Consolidated Mining Company idia Mankayan ken Philex idia Tuba ken Itogon.

Sigurado nga usaren dagitoy a kompanya ti amin a wagas ti panangallilaw ken panagranggas tapno magun-od dagiti dakes a panggep da. Interamente nga imbuaryang ti rehimen nga US-Arroyo ti ruangan ti pannakagamrud dagiti kinabaknang ti Pilipinas. Idi Disyembre 2004, imbaga na idia Kalinga, “Siguradon a matuloy ti panaglukat dagiti minas.”

Ngarud, agpampanawagan manen ti Cordillera Peoples’ Democratic Front (CPDF) kadagiti umili ti Kordilyera tapno intayo pairutan ti panagkaykaysa ken agsagana a lumaban iti mapadpadaanan nga idadarup dagitoy a kompanya ti minas. 